

## Script of Evening Gojri News Bulletin 23 December 2024 at 1700 Hrs

ایوننگ گو جری نیوز بلیٹن مور 23 دسمبر 2024

\*\*\*\*\*

یوہ آکا شوانی جموں ہے ظفرا قبال تے نصرت چودھری تیں خبر سنو۔ پہلاں خاص خاص خبر۔

\*\*\*\*\*

\*1۔ وزیر اعظم نریندر مودی نے روزگار میلہ ماہہ 71 ہزار تیں زیادہ تقرری نامہ تقسیم کیا ہیں، تے کہیو جے ڈھیڑ سال ماہہ 10 لکھ تیں متی ملازمت فراہم کی گئی ہیں۔  
\*2۔ آئی ایس ایف آر 2023 غے مطابق جموں کشمیر ماہہ بھارت غا سب تیں زیادہ پیداواری جنگلات ہیں۔

\*3۔ مرکزی وزیر ڈاکٹر جتندر سنگھ نے کہیو ہے جے حکومت نے گذشتہ دہائی غے دوران نواں اقدامات غے ذریعے ضائع شدہ مواد تیں دولت پیدا کی ہے۔  
\*4۔ بھارت غی نصرت فاطمہ نے جو ننیر پنچک سیلٹ چمپئن شپ ماہہ چاندی غو تمغو حاصل کیو ہے۔

\*5۔ تے کشمیر ماہہ سردی غی لہر غے درمیان ڈل جھیل جم گئی ہے تے جموں ماہہ ہلکی بوندہ باندی ہوئی ہے۔

\*\*\*\*\*

خبران غی تفصیل نال پہلاں ظفر اقبال۔

### PM Rozgar Mela

وزیر اعظم نریندر مودی نے آج کہیو ہے جے گذشتہ ڈھیڑ سال غے دوران سرکار نے مُلک غا 10 لکھ بے روزگار نوجوانان نانہ سرکاری ملازمت دتی ہیں۔ وزیر اعظم مودی نے 14 واں روزگار میلا غے دوران ویڈیو کانفرنسنگ غے ذریعے تقریباً 71 ہزار نواں پھرتی ہوا نوجوانان نانہ تقرری نامہ بندن غے دوران ان گلاں غی جانکاری دتی۔ وزیر اعظم نریندر مودی نے مزید کہیو جے گذشتہ 10 بہراں توں سرکار نے اک مہم شروع کی جے سرکار بکھ بکھ وزارت، محکمہ تے اداراں غے اندر بے روزگار نوجوانان نانہ روزگار فراہم کرے۔ جناب مودی نے کہیو جے اس طرح غا روزگار میلا نوجوانان نانہ باختیار بنا غے ان غی صلاحیت نانہ باندے آئے۔ وزیر اعظم مودی نے کہیو جے مُلک غا نوجوانان غا ہنر تے صلاحیت نانہ بھر پور استعمال کرن واسطے سرکار پُر عزم ہے۔ جناب مودی نے دیہی علاقاں ماہہ روزگار دین بارے گل کرتاں واں کہیو جے سرکار نوی پالیسی تے اس طرح غا قدم چاہ رہی ہے جے واہ مُلک غا دیہی علاقاں ماہہ وی نوجوانان واسطے روزگار غا مواقع اور زیادہ پیدا کر سکیں۔ ایان مرکزی وزیر ڈاکٹر وریندر کمار نے بی ایس ایف ہیڈ کوارٹر بڈگام ماہہ قومی روزگار میلا ماہہ شمولیت اختیار کی۔ تقریب ماہہ بولتاں واں ڈاکٹر وریندر کمار نے کہیو جے وزیر اعظم مودی غی سربراہی آلی سرکار مُلک پھر غا نوجوانان نانہ روزگار فراہم کرن واسطے وعدہ بند ہے۔ جناب کمار نے تقرری نامہ حاصل کرن آلاں نانہ کہیو جے وے محنت اور لگن غے سنگ مُلک واسطے کم کریں۔ انہاں نے مزید کہیو جے نوجوان وکست بھارت 2047 غا ہدف نانہ پورو کرن بارے اپنو کردار ادا کریں۔

\*\*\*\*\*

JK Forests

بھارت جنگلات بارے سٹیٹ رپورٹ 2023 جس نانہ مرکزی ماحولیات غا وزیر بھو پیندر یادو نے حال ہی مانہ جاری کیو ہے، رپورٹ مانہ مرکزی زیر انتظام علاقہ جموں کشمیر بارے 3 مثبت نتیجہ سامنے آیا ہیں۔ رپورٹ مانہ دسیو گیو ہے جے جنگلات غی پیداوار مانہ پورا بھارت مانہ جموں کشمیر پہلا مقام ور ہے۔ جموں کشمیر یوٹی مانہ جنگلات پیداوار 296 عشاریہ 2 کم پر بیکٹر ہے۔ رپورٹ مانہ یوہ وی دسیو گیو ہے جے جموں کشمیر مانہ جنگلات غی پیداوار 34 عشاریہ 78 سکیر کلو میٹر ہوئی۔ اس کامیابی نانہ دیکھتاں واں جموں کشمیر جنگلات محکمہ نے ایف آر ایم سی کمپلیکس نروال جموں مانہ بوٹالان غی اک مہم وی شروع کی ہے۔ جس غی سربراہی پی سی سی ایف غا سربراہ پی کے سنگھ کر رہیا تھا۔ اس طرح غی پہل توں ظاہر وے جے ظاہر وے جے متعلقہ محکو ہریالی نانہ بدھان واسطے وعدہ بند ہے۔

\*\*\*\*\*

### National Farmer's Day

مُلک پھر مانہ اج کساناں غو قسمی دن منایو جا رہیو ہے۔ یوہ دن مُلک غی ترقی مانہ کساناں غا تعاون نانہ خراج تحسین پیش کرے۔ یوہ خوراک غی حفاظت نانہ یقینی بنان، دیہی معیشت نانہ برقرار رکھن تے مُلک غا ذرعی ورثا غا تحفظ مانہ کساناں غا اہم کردار غی یاد دہانی غا طور ور وی کم کرے، کساناں غا اہم کردار نانہ تسلیم کرتاں واں حکومت نے ان غی سماجی تے اقتصادی، پائیدار ذرعی ترقی نانہ یقینی بنان واسطے کئی اقدامات کیا ہیں۔ اُن پروگراماں مانہ پردھان منتری کسان سمان نیدھی، پردھان منتر فصل بیما یوجنا تے پردھان منتری کسان مان دھن یوجنا شامل ہیں۔

\*\*\*\*\*

### PM /VP tributes

نائب صدر جمہوریہ جگدیپ دھنکڑ نے اج مُلک غا سابق وزیر اعظم چودھری چرن سنگھ نانہ اُن غی یوم پیدائش ور نوی دہلی غا کشن گھاٹ مانہ خراج عقیدت پیش کیو ہے۔ میڈیا سنگ گل کرتاں واں جناب دھنکڑ نے کہیو ہے جے 2001 مانہ چودھری چرن سنگھ غا مُلک گا کساناں تے دیہی ترقی گا کمان نانہ دیکھتاں واں کسان دیوس شروع کیو گیو تھو۔ وزیر اعظم نریندر مو دی نے وی مُلک غا سابقہ وزیر اعظم چودھری چرن سنگھ نانہ اُن غا یوم پیدائش غا موقعہ ور زبردست خراج عقیدت پیش کیو ہے۔ اپنا اک سماجی میڈیا پیغام مانہ جناب مو دی نے کہیو ہے جے چودھری چرن سنگھ غریب تے کساناں غا خیر خواہ تھا۔

\*\*\*\*\*

### Poonch Awareness Programe

ضلع انتظامیہ پونچھ نے بس اڈہ پونچھ غا مقام وراج اک روزہ بیداری پروگرام غو انعقاد کر غے عوام نانہ سرکار غی طرفوں چلائی جا رہی سکیم بارے جانکاری دتی۔ اس بیداری پروگرام مانہ تحصیلدار حویلی اظہر منہاس نے عوام نانہ پی ایم مفت بجلی سولر یوجنا تے پی ایم سوریا اڈھے اسکیم بارے جانکاری دتی۔ اس پروگرام غو مقصد عوام نانہ سرکار غی طرفوں چلائی جا رہی ان اسکیم بارے بیدار کرنو ہے۔ قابل ذکر ہے جے انتظامیہ غی طرفوں اس طرح غا بیداری پروگرام شروع کرنو ظاہر کرے جے انتظامیہ عوام غی ترقی تے شفافیت بارے وعدہ بند ہے۔

\*\*\*\*\*

### Circular Road Accident

کل سرکو لروڈ وراک المناک حادثہ مانہہ 12 وین جماعت غا اک طالب علم غی جان چلی گئی، جس تیں بعد ڈپٹی کمشنر جموں سچن کمار ویشے نے اس غی مکمل تحقیقات غو حکم دتو۔ تحقیقات واسطے پی ڈبلیو ڈی غا اگزکیٹو انجینئر، اسسٹنٹ ریجنل ٹرانسپورٹ افسر تے اسسٹنٹ کمشنر رونیو جموں ورا مشتمل اک کمیٹی تشکیل دتی گئی ہے۔ ٹیم نانہہ تفصیلی رپورٹ فوری طور ورا پیش کرن غی ہدایت دتی گئی ہے۔ ڈپٹی کمشنر نے یقین دوايو ہے کہ تحقیقات غا نتائج غی بنیاد ورا سخت تے مناسب کاروانی کی جائے گی۔

\*\*\*\*\*

مزید خبراں نال نصرت چودھری، ورا اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آنیر ڈاٹ گوو ڈاٹ ان ورا وی (دستیاب ہیں، اس تیں یہ خبر مہاری موبائل ایپ تے ڈی ٹی ایچ ورا وی دستیاب ہیں

**Dr jatinder Singh**

عوامی شکایات تے پنشن غا وزیر مملکت ڈاکٹر جتندر سنگھ نے کہیو ہے کہ حکومت نے گذشتہ 10 بہراں مانہہ ضائع شدہ مواد توں دولت پیدا کرن غو اک نووں سلسلو شروع کیو ہے۔ انہاں نے یاہ گل اج نوی دہلی مانہہ ”گڈ گورننس پریکٹس“ ورا قومی ورکشاپ غو افتتاح کرتاں واں کہی۔ اپنا خطاب غے دوران انہاں نے فزیکل فائیلز نانہہ کم کرن تیں لے غے گُرسی تے کمیونٹری جیسی ضائع شدہ چیزاں غا ماحولیاتی اثرات ورا غور کرن ورا تبادلہ خیال کیو۔ وزیر موصوف نے صفائی مہم نانہہ نچلی سطح توڑی پھیلان غا امکانات ورا وی تبادلہ خیال کیو۔

\*\*\*\*\*

**Pak Militant Arrested**

جموں کشمیر پولیس نے پاکستانی تربیت یافتہ اک دہشت گرد جاوید منشی نانہہ حراست مانہہ لے لیو ہے۔ اس دہشت گرد نانہہ مغربی بنگال غی پولیس نے بھارت بنگلہ دیش سرحد وراں گرفتار کیو ہے۔ اس دہشت گرد غو تعلق پابندی یافتہ تنظیم تحریک المجاہدین سنگ دسیو کیو ہے۔ جہیزو آئی ای ڈی تہماکہ کرن تے دو جا ہتھیار چلان مانہہ تربیت یافتہ ہے، تے یوہ لشکر طیبہ دہشت گرد تنظیم غی ہدایت ورا بنگلہ دیش جان غا فراق مانہہ تھو۔ حراست مانہہ لیا گیا اس شخص نانہہ جموں کشمیر پولیس غے حوالے کیو گیو ہے۔ جت اُس تیں مزید پوچھ تاچھ کی جائے گی۔

\*\*\*\*\*

**Announcement**

آکاشوانی جموں غا علاقائی خبراں آلو شعبو 100 تہاڑاں ورا مشتمل انٹنسیفانڈ سٹاپ ٹی بی کمپین یعنی ٹی بی غی روک تھام بارے موثر مہم جہیزو جے مُلک پھر غا 347 ضلعان مانہہ صحت تے خاندانی بہبود غی مرکزی وزارت نے 9 دسمبر نانہہ شروع کی تھی اُس سلسلہ نانہہ اگے بدھاتاں واں اک خاص 30 منٹ ورا مبنی پروگرام 25 دسمبر نانہہ 9 بج غے 30 منٹ ورا سویرے نشر کرے گو۔ اس پروگرام نانہہ نشر کرن غو خاص مقصد لوکاں نانہہ ٹی بی نانہہ قابو کرن تے اس غا اعلاج بارے بیدار کرنو ہے۔ اس پروگرام نانہہ تم آکاشوانی ورا سُن سکیں۔ اس تیں علاوہ تم اپنی رائے تے مشورہ

**rnu@gmail.com**

ورا سانچہ کر سکیں۔

\*\*\*\*\*

**PCB India s Matches**

پاکستان کرکٹ بورڈ نے بھارت سنگ کھیڈیا جان آلا آئندہ سال 2025 غی چمپئنز ٹرافی واسطے متحدہ عرب امارات نانہہ غیر جانیدار مقام قرار دے دتو ہے۔ واضع رہ جے بھارت نے اس توں پہلاں چمپئنز ٹرافی غا کرکٹ مقابلان غی خاطر ٹیم غا پاکستان غو دورو کرن تین حفاظتی تشویشاں غے پیش نظر انکار کر دتو تھو۔ بین القوامی کرکٹ کو نسل آئی سی سی نے گذشتہ 19 دسمبر نانہہ تصدیق کی تھی جے بھارتی کرکٹ ٹیم سنگ کھیڈیا جان آلا چمپئنز ٹرافی غا تمام مقابلان ہا نیبرڈ ہو سٹنگ ماڈل غی بنیا د ور کسے غیر جانبدار مقام ور کھیڈیا جائیں گا۔ یوہ فیصلو دو حریف کرکٹ ملکان بشکار پیدہ شدہ تعطل غے بعد کیو گیو ہے۔ جس غے بعد ہن آئی سی سی نانہہ 50 اووراں غا کرکٹ مقابلان ور مبنی اس ٹورنامنٹ کا میچاں غا مقامات طے کرن غو موقع مل سکیو ہے۔

\*\*\*\*\*

### Pencak Silat Championship

سنکو کرگل غی اک نوجوان کھلاڑی نصرت فاتمہ نے ابو دابی مانہہ 5 جو نئیر ورلڈ پنچک سانلٹ چمپئن شپ مانہہ چاندی غو تمغو جت غے بھارت غو سر فخر نال اچو کیو ہے۔ یاه تقریب 18 تین 22 دسمبر توڑی منعقد ہوئی۔ جت نصرت نے 58 کلو گرام جونئیر کیٹا گری مانہہ حصو لیو۔ اس غی کامیابی لداخ جیسا خطہ مانہہ بے پناہ ہنر نانہہ اجاگر کرے تے نچلی سطح ور کھیڈان نانہہ فروغ دین غی ضرورت ور زور کھلے۔ نصرت غی کامیابی اس غی محنت تے عزم غو ثبوت ہے۔ جھیڑی عالمی کھیڈان مانہہ بھارت غی بدھتی وی طاقت نانہہ ظاہر کرے۔

\*\*\*\*\*

### Weather

جموں کشمیر مانہہ سردی غی لہر مانہہ مسلسل باہدو ہو رہیو ہے، جموں مانہہ کھٹوں کھٹ درجہ حرارت 6 عشاریہ 5 ڈگری سلیسس تک تلے آگیو ہے تے زیادہ تین زیادہ درجہ حرارت 18 عشاریہ 4 ڈگری سلیسس رہیو ہے۔ جموں شہر تے اس غا کول کال غا علاقان مانہہ ہلکی بوندہ باندی ہوئی ہے۔ محکمہ موسمیات نے پلکیں جموں کشمیر مانہہ شدید سردی غی لہر غی پیشن گوئی کی ہے۔ تے ڈل جیل غی سطح جم گئی ہے۔ شدید سردی غی لہر نے وادی کشمیر نانہہ اپنی مانہہ لے لیو ہے۔ محکمہ موسمیات غے مطابق شہر مانہہ کھٹوں کھٹ درجہ حرارت منفی 7 ڈگری سلیسس تے زیادہ توں درجہ حرارت 7 ڈگری سلیسس ریکارڈ کیو گیو ہے۔

\*\*\*\*\*

اس غے نال ہی خبراں غو یوہ بلیٹن ختم ہوو۔